



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

ig tiryimym@aolima

yt tir yimym

TAPAK 8

PM Modi-i lanur 51,000 nem mapanung shimokba shidi agütsü

India den T20 asayamung atema Australia team captain asütsü Wade shimogo



VOL. XXI NO. 21 (ADOK 21) DIMAPUR AMUNGNÜ (SUNDAY) MONGPUTENI (OCTOBER) 29, 2023 ₹ 5.00

Advisor to PM Sanjeev Sanyal-i Nagaland semdang

Dimapur, October 28, 2023

(TYO): Prime Minister Narendra Modi atema economic advisor Sanjeev Sanyal-i Nagaland semdangta atema arua lir.

Sanjeev Sanyal ya India Prime Minister asoshi Economic Advisory Council nung züngsem ka lir ta home department-i metetdaksü.

Pai Nagaland semdangba ajanga wadang aika nung tajangzük angutsü aser rongsenketzüng jenjang melenshitsu ta home department-isa ashi.

Sanyal ya economist aser urban theorist tajung ka lir aser pai Prime Minister Narendra Modi atema advisor ama

inyakdang India nung rongsenketzüng policy tajung aika yangluogo.

Sanyal-i Nagaland nung anogo pezünü amondang rongsenketzüng tayongzükbatem aser maongkatem tali angatetsü.

Pai local entrepreneurs, sorkar ketdangsurtem, shishilembartem aser lokti lennir balala den ajurutepa sensaksemtsü.

Sanyal-isa Chakhabama nung Netaji Subhas Chandra Bose amongba ki, Lozaphuhu yimtsüng, Ruzazho yimtsüng nung INA Memorial Park yangludak, Netaji Subhas Chandra Bose INA route trekking aser Kohima nung World War II Cemetery semdangtsü.

Assam nung DNLA telungpur 181 temai adok

Guwahati, October 28, 2023

(Agencies): Honibarnü Assam nung Dimasa National Liberation Army (DNLA) telungpur 181 temai adokogo.

Haflong nung aliba Daulagupu stadium nung sentong balaka ayonga agidang DNLA züngsem 181-i Chief Minister Himanta Biswa Sarma lia temai adok.

Iba sentong nung North Cachar Hills Autonomous Council (NCHAC) CEM Debolal Gorlosa, Assam DGP GP Singh, minister Pijush Hazarika, minister Jayanta Malla Barua, minister Nandita Gorlosa, Additional DGP Hiren Nath aser Additional Chief Secretary Ravi Kota nungertem aden.

Iba sentong nung DNLA telungpurtemi prangpong-

injangtem bener arua agütsü aser parnok nisung shia nem senotsü teyari Rs 4 lakh fixed deposit agüja liasü.

“May 2021 nungi tenzüker Assam nung telungpur 7,200 jungnüa temai adokogo aser telungpuri nisung tepsetba ka danga mali. Küm 20 tejekdang nisung 400 tema asü. Onoki Assam nung telungpur khuret agiennür aser Bharat nung tematiba state 5 rongnung dendaktsünür” ta CM Sarma-isa ashi.

DNLA-i taküm küm tetenzüklen sorkar den peace agreement ka nung sign sütepa liasü. Iba mapang Union Home Minister Amit Shah aser Chief Minister Himanta Biswa Sarma na liasü.

Arunachal nung 'zero attendance' school 400 shibangogo

Guwahati, October 28, 2023

(Agencies): Arunachal Pradesh sorkari school teimba akümtsüba masü saka shisaliok jenjang tajungba ajümtsü atema temulung agütsür, ta Chief Minister Pema Khandu-isa ashi.

Arunachal nung school aika infrastructure aser nübo peria mali aser school tem lapokba ya nübertem peladaktsütsü atema inyakba mapa ka lir ta pai ashi.

“Onoki shisaliok kanga süöki ia agir. Sorkari zero attendance school 400 jungnüa shibangtsüogo” ta CM Khandu-isa ashi.

“Iba mapa maneni inyakdar. Asenoki school talila masü saka tanga lapoka aliba school tem nung shisaliok jenjang tajungba kümdaktsünür aser iba atema sorkari akokba tashi teyari agütsür. School aika lapokba masü saka shisaliok jenjang tajung agütsür asü masü ta asüba tongtipangba” ta paisa metetdaksü.

“Asenoki shisaliok jenjang

nung tenük meyoki school ka sülen ka lapoka ao” ta Khandu-isa shisem.

Arunachal Pradesh nung India nüjiso mangudang lapokba school ajak ‘Heritage Schools’ ta sangdongtsü aser item school nung infrastructure renlokba den museum lapoktsü ta paisa ashi.

Government Secondary School, Balek indang Platinum Jubilee nung jembidang pai iba osang metetdaksü. Iba school ya 1946 küm Lower Primary school ka ama mezüng lapoka liasü.

“School tem timi inyaksangshia aotsüba nung School Management Committees (SMC) tebilemstü khuret tulu lir. Anungji Arunachal nung SMC züngsem ajaki mapang shia school tem semdanga tesayurtem, kaketshirtem aser tsüraburtem den ajurutepa sensaksemtsüla. SMC-i pei pei school nung nungdakbatem bangdak DDSEs nem osang agütsütsüla” ta CM Khandu-isa ashi.

Israel sepaitemi Gaza yimti nung rara tenzükogo Palestine nung chiok nung dang Israel nung chioktsü: Hamas



October 28, 2023 nü Israel sepaitei Gaza City nung Hamas nung alidak ka bomb amshia maddokdang agiba noksa angur.

New Delhi, October 28, 2023

(Agencies): Israel tepuokdak yua aliba Palestine nung ajak chiokra parnoki pua aliba Israel nung ajak chioktsü ta Hamas-i Honibarnü metetdaksüogo.

Honibar nungi Israel-i Gaza City nung rara tulu tenzükba mapang ka Hamas-i iba takhangba agütsü.

Israel-i Gaza nung military campaign inyakba aitsür ta Turkey President Recep Tayyip Erdogan-isa ashi. Turkey nung ketdangsur ajak linüki meyipa arutsü tetuyuba agütsüogo.

“Israel aser Turkey tsüngda tesentaktep meyipa reprangshitsu atema iba tetuyuba agütsü” ta Israel Foreign Minister Eli Cohen-isa ashi.

Israeli army-i Hamas lennirtem aser infrastructure tongtiba Gaza anüdoklentip tsütsü lir ta bilema iba tesem amaker. Iba jagi Israel-i north Gaza nung aliba civilian dang South leni aotsü metetdaksa

liasü. Israel sepaitemi yasüng piyong Hamas tesemtem amakba sülen Gaza Strip telung nung maneni raradar.

Russia-i mepishiba sülen Hamas-i Russian-Israeli dual citizen 8 bushiteper ta osang metetdaksüogo

Russia-i Hamas den tesentaktep tajung lir aser iba jagi Gaza nung Hamas-i pua aliba nisung 8 chioktsü atema mapa inyaker.

Israeli army-i yasüng Gaza nung kanga amak aser idangji Hamas commander tongtipang ka den züngsem aika tepsetogo ta ashi.

Israel-I Hamas indang "underground targets" 150 maddokogo aser sepaitem raraba tesem nung maneni lir ta Israel Defence spokesperson Daniel Hagari-isa ashi.

Chiyungtsü aser tzü abenba aid trucks tanü Gaza-i aotsü melaogo

ta paisa ashi. Hokolbar aonung Israel-i amakba mapang Gaza nung internet aser phone services shibangogo. Human Rights Watch ta ser NGO katibo communication blackout ajanga nisung aika tepsetba miimbangtsü akok ta tebilemstü lemsatepogo.

“Gaza Strip anüdoklentip tsütsü onoki kodanga mengudangba bomb amshia poksatsüogo. Iba tesem nung aliba mozü kidang ambulance drivers-i nisung shinga den mejembiteter aser iba jagi parnok bomb apokba tesem leni aoer ta ashi” ta BBC journalist kati ashi.

Külen, Hamas züngsemtemi parnoki Gaza nung Israel anema raratsü renema lir ta metetdaksüogo.

Hamas-i Gaza nung hospital tulutiba parnok headquarters ama beshir aser tanga mozü kitem nungia mapa inyaker ta Israel-i tai tongloktsür.

Spain nung Nagaland music & arts industry osang lemsatep

Dimapur, October 28, 2023

(TYO): Task Force for Music and Arts (TaFMA) chairman Theja Meru-i Spain nung Nagaland indang music and arts industry osang lemsatepogo.

Spain kübok A Coruna nung WOMEX ta ser anogo troknnü worldwide music expo amonger aser iba benjung nung Theja Meru ya Speaker Delegate ka asütsü jaoka liasü.

Honibarnü Asian networking session nung pai o jemi aser idangji Nagaland nung music and arts industry aser Hornbill Festival indang osang metetdaksü.

“Hornbill Festival ya kümshia December 1 nungi December 10 tashi amonger aser iba ajanga Naga nung sobaliba sayuba den kentenba benjung tulu agir. Hornbill music festival ya



Theja Meru

Northeast nung kenten benjung tulutiba lir” ta Meru-isa ashi.

Theja Meru-isa WOMEX director Alex Walter den ajurutep aser idangji tarutsü nung külemi yaritepa aotsü aser music industry ajungkettsü atema tebilemba lemsatep.

“WOMEX nung shilem agiba ya Nagaland-i tangar den sendakteptsü aser world music

and arts map nung art and culture ajungkettsü atema lir. Iba sentong nung shilem agiba ajanga music tali tajungba angatetsü aser artists o cultural ambassadors yaritsü atema lir” ta Theja Meru-isa ashi.

Meru-isa WOMEX dang pa jaokba atema pelaba metetdaksü aser iba ajanga Nagaland nung music industry agizükba sayur ta ashi.

WOMEX ya alima nung kentenba sentong tulutiba lir aser iba nung trade fair agiba den talks aser showcases concerts alir.

Kümshia October ita nung linük 90 nungi WOMEX nung professionals 3,000 tema aser performing artists 260 tema adenshia amonger.

WOMEX nung state 7 lir aser exhibiting companies 700 aser speakers 100 temai shilem agir.



Mokokchung - Mariani lenmang tangshia aliba yim telungjem (Mokokchung - Mariana Roadside Villagers Concern Forum) pur 3 buba lokti senden 28th Oct nü parnok kimen, Imtiwati, Aongza Ward Mokokchung kidang akadang tangokba noksa nung angur. Iba telungjem nung yim 13 - Ungma, Khensa, Meküli, Chungtia, Aliba, Changki, Chungliyimsen, Satsükba, Japu, Moayimti, Chungtiayimsen, Watiyim aser Aokum yimtsüngtem lir. Mokokchung, 28th October, 2023

2buba Dorians Society Spell Bee tetoktepba Likyaro-i kokogo

Dimapur, Mongputeni/October 28 (TYO): 2buba Dorians Society Spell Bee tetoktepba Hope Academy (Class 8) nungi Likyaro Patton-i kokogo. Iba tetoktepba ya October 28 Dimapur nung ayongzüka agi, kong tetoteper 50 dak temai shilem agia liasü.

Iba tetoktepba nung tanabuba aser tasembuba jenjang nung Don Bosco Higher Secondary School nungi Shahnaz Ali (Class 9) aser Liz Woodland School nungi Kowsara Begum (Class 8) na liasü. Tetoktepba nung takok angurtem nem senpet sen 10,000, 5000 aser 3000 den kuli kakat tajung agüja liasü.

Dimapur, Niuland aser Chümoukedima district nung aliba school tem nungi class 7 nungi 9 tashi nung azüngertem atema inter-school spelling tetoktepba ya lapokja liasü aser Kingdom Culture Church hall, Dimapur nung agiogo.

Tetoktepertem ya school 27 nungi liasü aser tetoktepba nung shilem agiba school shia nungi tetokteper anana yoka liasü.

Tetoktepba ya tetendanger ana aser pronouncers anati achaayanga liasü. Tetokteper ajak nem English osep nungi ojang ka ashitsü asoshi minute anana agütsü aser parnok nem ojang tetezü, part of speech, etymology, oren ka nung iba

ojang amshia sayutsü atema asüngdangtsü asoshi maongka agüja liasü.

Dorians Society-i ashiba agi, iba tetoktepba ya kaketshirtem tetoktepba nung shilem agidaksütsü aser parnok nem sabang tuluba nung shilem agitsü asoshi lenmang lapoktsütsü nükjidong nung ayongzüka agi.

Dorians Society ya lokti nung temelenshi tajung bener arutsü nükjidong nung 1997 küm tenteta liasü. Mezüngbo parnok saisapong dak dang rangloker liasü saka tangbo parnoki Spell Bee tetoktepba amala densema inyakyim balala benoka inyaksangshia arudar.

AR-i Company Commander den sensaksem sentong ka ayongzüka agi

Dimapur, Mongputeni/October 28 (TYO): Lokti nem shilem agidaksütsü aser lanurtem ajungmesotsü atema Assam Rifles-i, October 26 nü Avangkhu, Nagaland nung Company Commander den sensaksem sentong ka ayongzüka katsüogo.

Iba sentong nung kaketshir 28 (tetsür 15 aser tebur 12), tesayur 12 aser village council

züngsemtemi shilem agia liasü.

Sentong nung kati ka den sendakteptsü atema asayatem, lanurtem ajungmesotsü atema inyakyim balala ayongzüka agiba den sentong nung shilem agirtem chiyongngdakja liasü. Iba tesem nung aliba lanurtem ajungmesotsü nükjidong nung iba sentong ayongzüka agiogo.

Sentong nung tanurtem aser

sepaitem kanga pelatep shilem agia liasü.

Iba den bendenloksema kaketshirtem parnok kakat shisatsü bushiba nung teyari agütsütsü asoshi Assam Rifles-i writing pads lemja liasü. Sentong tajung ayongzüka katsüba atema shilem agirtem ajaki Assam Rifles dang kanga pelaba lemsatepogo.

KLWS-i ayongzüka Chaga Gadi benjung ayongzüka amungtsü

Dimapur, Mongputeni/October 28 (TYO): Kohima Liangmai Welfare Society-i ayongzüka October 30 nü Kisama heritage Village nung Liangmai Chaga Gadi beenjung amungtsü.

Nagaland sorkari restricted holiday agütsütsü temelaba agütsür aliba dak ajemdaker October 30 aser 31 nü ya soti

mali asünung Liangmai Welfare Society Kohima tir Rutmakbo Newmai-i state sorkar aser private firm, sector aser loktitentetem dang iba benjung nung shilem agitsü atema Liangmai nungertem nem restricted holiday agütsütsü asoshi mepeshia metetdaksüogo.

Liangmai Welfare society-i

Kohima nung aliba Liangmai nung shirnok benjung nung shilem agitsü janrrar parnok benjung amungba tesemi anir orr arutsü atema bus anepalutsüogo. Bus ya October 30 anepdang 8:30 ako nung Secretariat area aser Don Bosco School nungi apusotsü, ta kasa sangdong ajangsa metetdaksü.



October 27 nü F&RMCA hall Tuli nung Financial literacy camp ka takok ngua agiogo. Iba sentong nung shisalen sayurtem ji Investment Development Authority of Nagaland nungi ketdangsurtem liasü. Iba camp nung Tuli administration, Tuli temeket nung aliba Village council ajak, Tuli aser Tzudikong naprongla nungi ward union tem, Tuli aser Tzudikong nungi kaketshir lokti tentetem, GB union aser entrepreneur temi shilem agia liasü. Iba sentong ta BAN Tuli chapter-i ayongzüka MLA aser Advisor A. Pangjung Jamir-i achaayanga agiogo.

Naga Hoho-i asükhu lemsatep

Dimapur, Mongputeni/October 28 (TYO): Naga Hoho-i sangdong ka ajanga, taoba Naga Hoho Speaker Akang Ao, October 26 nü ajungbena asübaa osang angazüka kanga aoksaba lemsatepogo.

Pa ya kanga dang tesüngjem aser mulungsu aketba lokti tenzüker ka liasü, shibai pa taküm tepeyong Naga nung asoshi bendanga agüja inyakogo, ta tir H.K Zhimomi-i ashi.

"Pa temulungtetba tulu aketba aser bendanga agüja inyakba nisung ka liasü; pa

kanga ajemalu nisung ka liasü aser pai nürburtem atema mapa tajung inyakteta toktsüba ajaki menungra bilemtettsü. Pa asüba ya Naga nung asoshi takoksa tulu, kechiyong pa kanga lenir tajung ka liasü," ta tir-i ashi.

Mangyim tejashi mapang nung Naga Hoho-i asür kinungertem den asükhu lemsateper aser asen tulusang Tsüngremi parnok nem anisüngzük agüjang ta sarasademtsür. Pa tanüla teti tatem makadak anisüngzükdakjang ta sarasademtsü, ta tir-i shisem.

Nestvibe music studio lapokogo



Dimapur, Mongputeni/October 28 (TYO): Nestvibe ta nungja agütsür music studio ka tanü Kohima nung lapokogo. Nestvibe studio ya KLBC Pastor Renthungo Kikon-i meshiteta sarasademtsür lapokja liasü.

Nestvibe studio lapoktsü atema Martin Longkumer-i apitet shiba music industry nung Macnivil tenüng amshiba agi jangjar. Pa den Er. A. Rentsamo Tsopoe aser Viketoulie Metha (Ket Meth) nungeri iba studio lapokogo.

Music dak sendakba nung par asem dak sempet tajung lir aser iba den tajangshiba aika bona lir. Nestvibe Studio koba Merhülietsa (Paramedical) Colony, Kohima nung amenoka lir, iba studio ya state-of-the-art facility ka lir aser iba ajanga musicians, recording artists, aser audio enthusiasts tem tenüngdakba peridaksütsü. Studio ajanga acoustically optimized environment ka agütsür aser technology tajung aika inoka lir aser iba ajanga artist tem nem ken yanglutsü, mangaoktsü aser parnok indang music produce asütsü asoshi maongka agütsütsü

ajungkettsü atema Nestvibe bendanga agütsür aliba sayur.

Nestvibe ngutetsang Martin Longkumer-i ashiba agi, "Nestvibe ya studio ka dang masü saka iba ya inspiration aser creativity asoshi tesepe ka lir. Onoki artist tem renloka aotsü atema maongka agütsüner aser musician tem parnok pungmang asangsang kümdaksütsü asoshi onok nükjidong lir. Onok indang studio amenokba sülen kodanga majangshidangba ama onoki artist tem parnok indang sempet sayatsü asoshi sabang ka agütsür."

Nestvibe-i, professional recording, mixing, mastering, voice-over, sound design amala service tem agütsür. Studio semdangertem nem jenjang aketba tajangshiba tajung agütsütsü atema studio bendanga agütsür lir aser iba ajanga industry nung parnok tangar dang nungi balaka kümdaksür.

Nestvibe-i, musician, artist aser kenten janrrartem dang parnok studio semdangtsü jaokogo. Iba studio ya musician tejen aser tasentem ajak asoshi kanga tapet lir.

Nestvibe dak sendakba nung osang tejangjaba agitsü atema item number: 7005193827/6909931354 nung tongteprateptsü asoshi metetdaksüogo. Maneni Nestvibe den @nestvibe mesüra www.nestvibe.in semdanga sendakteptettsü.

Studio tasen amenokba nungdem nung Nestvibe-i, tang nungi tenzüka December 31 nü tashi costumer tem nem studio service ajak nung 30% discount agütsütsü ta sangdongogo. Iba maongka agütsüba ajanga artist tem



TIR YIMYIM YIMOBILEM (EDITORIAL)

DIMAPUR AMUNGNÜ, MONGPUTENI (OCTOBER) 29, 2023

Temeshiba metsü prokang

Asenok taküm nung teinyaktsü aika lir aser item teinyaktsütem rongnung temeshiba metsü proktsüba mapa ya kanga tongtibang lir. Apijemtsü Shin tapu 11 tekong 18 nung ashir, temeshiba metsü proktertem asoshibo chichiba sempet yuja lir. Aji süra, temeshiba metsü ya kechi aser kong nungi bener arua kong proktsü (?) ta asenoki tanübo sarasadema bilemdangdi. Laishibaisa ashir, Tsüngrem ya temeshi aser Pai asenoka Pa ama temeshi lidaktsüner. Aji oda, temeshiba ajak Tsüngrem nungi aser temenen shisatsü ajak mojing nungi angur. Anungji, kodang asenoki Tsüngrem temeshibaji bushidir, idangji asenoki temeshiba metsüjangji angutsü aser itemji asen alidak aseni inyakba mapatem aser asenoki jembiba o tem ajanga proktsü. Aji oda, anogo shia Tsüngremer temeshiba bushiba mapa nung nisunger tajangzük tulu lir ta Laishibai kuli agutsür. Mathi tapu 6 tekong 33 nung ashir, asenoki Tsüngrem yimli aser Pa temeshiba bushira, asenok nungdak ajak ataloktsü. Atangji, alima nung nisung taküm ka temeshi alitsübaji tasak saka kodang nisung kati pei taküm meshiteta lidir, kecha shisabolutsü mali, asen nungdak ajak Tsüngremi inyaktsütsü. Aji oda, temeshi metsü proktertem atem sempet yuja alibaji kotak nung dang masü saka alima nunga jenti yuja lir ta angateter. Yisu temang iba lima nungi piladang, Pai asenok anepalutsü asoshi tanüla temeshi yoktsü nangzük. Aji oda, iba tanüla temeshi jagi anogo shia asenok anüker, asenok anir, asenok anepalur aser asenok nem telemtetba shitak agidaktsür. Asenoki asensasa alir amai bilema alitsüa akok, saka asen madak kibur aser lenir ka lir, ibaji Tsüngremi yokba tanüla temeshi, anungji iba tanüla temeshii mulungba nung asenok alitsübaji kanga tongtibang lir. Asenoki taküm nung Tsüngrem temeshibaji jungkai adoka alitsü atema asenok bilemba, asenoki inyakba aser asen jakla yimya ajak nung Tsüngremi mulungba meteta inyaktsüla. Asenoki aiben tangar anema majung bilemer, tenük meremer, tenük tasen adoker aser azüaponger, itemji temeshiba metsü agütsüsang nungi masü. Asenoki inyaksangshi nung aiben tangar metsüdaktsüsa inyaker, asenoki terbang agibo tajung jembir saka mapa agibo mesayuteter. Ibayongji asenoki temeshiba metsü proktsü melena temenen metsü proker akümer. Iba jagi aiben Tsüngrem nungi sempet tajung angutsü melena lendong aser takoksa-ang ajurur. Aji oda, nai Tsüngrem temeshiba metsüji na aolen proka jajadar ta nai bilemer asü ? Mesüra nü mulungjang nungbo tesempatsü mapatem, koba ajanga tanüla temeshii nü taküm nung mapa meinyakteter, item temenen mapatemji dang bilemer ? Atangji, temeshi mapa inyakba mesüra temeshi metsü prokba nung tajangzük aser sempet tulu lir. Mezüng Peter 1 tekong 15 nung ashir, " Tsüngrem shibai asenok aja, Pa koma temeshi lir, asenoka yamaji asen jaklaliro ajak nung temeshi alitsüla." Alima nung yimya ka lir, ibaji aseni kechi prokdir, ibaji asenisa arotsü. Aji oda, asüng asenoki temeshiba ajanga aruba sempet aser temoatsütemji aginüra, tanü asenoki temeshiba metsü proktsüla. Kechi koda asenoki asen taküm meshiteta alitsü meranger, yamaji asen bilemba, asen inyaksangshi aser asen jaklaliro ajak nung Tsüngremi aginüba ama meshiteta alitsübaji nisung ajak atema tajangzük tulu aketba mapa ka lir.

OLEMSABANG

Ochishir agi anüngakongba lima

~ L. Kika Pongener.

(Yashi adok nungi...)

Amos ainkar mapang nunga Israel nunger lokti nung ochimashi agi sunga liasü. Anungji Amos ainkari yamai shin, "Nenoki ochiba agi takü kümdaktsür aser temeshiba ali nung endoka-adoker. Sungküm nung arutsüba nisung dang nenoki sempar, aser atangji jembiba nisung dang nenoki sempar" (Amos-5:7-10). Amos ainkar mapang amai, tanü putu nunga loktiliba ajak nung, shirnoki yimjak nung ochi mashi mapatem anema tasü-ita, nungsen arema ochi o jembir, item nisungtemji sempar. Ano Amos ainkar-i yamai shin...."Nenoki sensaker dak ajemshi aser parnok nungi tsük agizüka agi nungji nenoki lung angenteta ki yangluaka nenok item ki nungji malitsü, nenoki tsükmenatsü lu yimaka nenoki item yi majemtsü. Kechiyong nenok ozüng raksaba jenti aser nenok temenen koba tulu ni meteta lir, nenoki tai maketer kangshir, supokrem agir, aser mokokmeiner sungküm nungi nungina yoker" (Amos-5:11-12). Israel nunger yimsusurtemi sensaker aser tilar dak tashiyim agi ajemshi, aser parnok meyong rakzüka agi, aser parnok dang nungi supokrem meshi aser ochishirtem sungküm nungi nungina yok....Tetezü lokti nungi agiena kinuklen/tezülen toktsü. Tanü asen lima nung lennir aikati, loktiji pei sunütsü sua anishitsü atema, tenzüker shimdanga pai/lai ashiba ajak nung ola madoki tekong angumdena 'hau-hai' ta tashi anga-a anidaktsüpur dang shimmer, aser ibajagi tanü asen lima aser loktiliba ajak rajang kümdaktsür.

Sorkar mapa nunga, tenzüker teimba kati nübur meyong senotsü tangutsütsü tim shitak magütsür. Linuk terenlok mapa inyaktsü agütsüba sen ochimashi amshir, jila/yimtsüng terenlok mapa atema agütsüba sen agi ochimashir ketdangsur kar dang ajangzüker. Aji oda, rongsen aika bendener jangradema alibaji nukmeremerba/tetla-tetshirba masü, saka asen alima ajungtsü/melenshitsü atema indang-indanga jembir. Kanga junga shisadanga, sorkar tenzüker kaji kechi koma-ka tular asüyongjia, pa/la tangutsü tim/itasen agi dangbo rongsen aikabo mebendentettsü sudi. Sorkar office kar nungbo sungo ajemtsü magütsüra, File anogo/hopta/ita aika sui-aka lapoka mereprangi toktsür...ta nüburtemi nungsen jembiba angazük. Shitakba-bo sorkar tenzüker shiba sudir suang, pa/la iba mapaji inyaktsü atema dang, sorkar-i itasen dalang agütsür iba menden nungji mendaktsür. Tanü asen lima nung tenung jateta aser tenung mejatet...'VIP' aika lir, aser parnok jagi lokti nem tenla sen merijang/lakh aika tenla agütsür, aser telok ajaki iba tenla sen-ji teka tashi agi mahdena agizüker, saka iba sen/rongsenji kong nungi anguba ta-bo shingaia meshisadanger. Tanü asen lima nung lokti ajak nung nübur tangatetbaji...Lenitsü, mapa akoktsü aser angazüktsübaji tongtipang masü, saka 'Envelope' melem-melema angutsüba...aji tongtipangba kümdaktsüogo. Atangji tanü loktiliba ajak nung ochi-to masü, saka 'SEN' kibur kümdaktsüogo. Atangji, tanü asen lima nung ochishir agi kanga anungakonger, yongji tanü asen lokti ajak mepetmesü agi sunga lir.

Tanü asen lokti nung lennir aikati yangkü semer awazür, lokti nung lennir teimba kati pei agitsü aser pei yangkü asungtsü arishidang, lokti rongsen/lokti senpong tazüng kümdaktsür. Tanü asen lima nung, loktiliba teimba ka nung, lokti meyong rongsen agi ochimashir lennir kar dang ajangzüker. Jila aser yimtsüng terenlok atema agütsüba senotsü, ketdangser/lennirtemi jakdak-jakdaka/odi-odia ochimashi ketdangsua amshir. Ajisuaka, kanga tesasatsüka, sen agi terbang nembangtsüba agi, nübur katia yabo taia...ta tasü-ita ola madoker. Jokorla, tanü asen lima nung, ochimashi inyaker to-ang shitak inyaker kümogo, saka ochishia inyaker to-bo meshitak inyaker kümogo. Ochimashir to lennir tajung saka ochishirto lennir tamajung kümdaktsüogo. Atangji, tanü asen lima aser loktiliba ajak chiji-mashi/langko-shishi küma-dokogo. Tanü asen lima nung, alima meimer lennir aika mali, saka sen/rongsen meimba lennir teimba kümogo. Lokti ka nung lennitsü shilem agi atara, sen/rongsen amshitsü/ketdangtsüba tongtipangba sudaktsür, aser sen/rongsen ketdangsua amshitsü dang odi-odia rakteper. Tanü asen yimden, arogo aser loktiliba ajunga nung tenzüker teimba kati, kodaser ozü lokti ajungtsü aser renloktsü (?)...ta masü, saka kodaser ni/ozü ajangzüktsü (?) Kechi koma inyak nung ni/ozü jonglongtsü (?) Kodaser ni talitsü lenmang sademtsü (?) Kodaser ni sunütsü sua lokti-ji anitsü (?)...ta asüba, aji-ang tongtipangba kümdaktsüba lennir aika lir. Atangji, tanü asen lima nung ochishir agi kanga anungakongba agi asen lima merenloker.

15 MAHILA BAND MANENI NUNGITTSÜ AYONGZÜKER

India nung nungtugu reality show 'India's Got Talent' Season 10 nung 15 Mahila Band-i tetenzük nungi tanü tashi kanga junga shilem agiba ngua jangratema bilemer aser par band nem maneni salute agütsür. Parnok sempet ajanga tetendangertemi tenük asungba tamaittsü 'Golden Buzzer' punguben tashi agütsüogo aser par band ya India lima kanga nungtugu küma nüburtemi vote agütsüba ajanga tanü parnok IGT nung Top 10 jenjang tongtetogo. Ya atamata mapa ka dangbo masü. Ya Nagaland asoshi otsü tasen ka yanglur asütsü. Ibai police department atema dang masü saka Nagaland state, Naga nunger aser Northeast India rangben asoshi nema atangtsü mapa ka lir. India Reserve Battalion (Mahila) ama telok kati India's Got Talent nung shilem agiba yabo ashiko ni aibelener ka mesüra India nung ibai mezüngbuba asütsü. Tang ya parnok temaleni atutsü atema nüburtem nungi vote nungdaka lir. Asenok ajaki Mahila Band ya support sünüaka aikati vote tagütsü mashira alitsü. Aji asünung, pei medemsor, kinunger, kiyongertem shirnok vote tagütsü mashi lir, parnok dang tashirtemi vote agütsütsü sayudi arungma. Asenoki Mahila band support asüba tamaittsü ajaki shilem agia vote agütsütsü ayongzüker. Tang ya parnok asoshi vote tejang kaja kanga senti lir, anungji, asenok ajaki maneni temeim sayua parnok nungitdi ta mepishir. 15 IRB Mahila Band madak Tsüngremer temoatsü lidakjang ta sarasadema atar.

Sd/-

Watilemba,

Former SSO (SSP)

Home Guards', Civil Defence and SDRF
Nagaland, Kohima.

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger agateta agitsü mepishir

Union Baptist Church, Kohima Golden Jubilee mong tenzükogo



Kohima, Mongputeni/October 28 (TYO): Union Baptist Church (UBC) Kohima anogo ananü Golden Jubilee sentong Honibarnü tenzükogo; "Pututem nungi putu; Pa nüngsang sangdonger" omen nung ajemdaker iba Jubilee amonger. Honibarnep Tenla kidang Jubilee sentong tenzükoga Seno Vihienuo-i Tsüngrem O jembia liasü, iba sülen tanüngba sentong ajakji NBCC Convention Centre nung agir. Tongti o jembir Town Baptist Church Dimapur pastor, Rev. Vilodi Sakhrie-i 2 Tim aser Rom nung aliba Lai tekongtem nung

ajemdaker Arogoi ochi nung Khrista osangtajung proktsü ayongzük. "Osangtajung ji tai atokba indang dang masü saka Khrista nung tatem maka taküm indang lir. Alima nung tongtibangtiba osangji, Khrista ajanga tatem maka taküm osang lir," ta pai ashi. Arogoji ochi tamendakdak aser tongshi asütsüla, ta shia pai, Khrista dak amangertemi taküm ayong-ayonga alitsü atema dang mebilemstüla, saka Yisu Khrista atema timtemtsü asoshi renema alitsüla, ta metetdaksü. Iba Arogo tentetertem rongnung D K Zeliang dang tang

tashi taküm lir; Souvenir Committee convener, Ako Whiso-i Jubilee nüngo kaket indang tongmelang agi metetdaksüba sülen D K Zeliang-i nüngo kaketji sayaja liasü. DK Zeliang-i tamangertem dang Kangki sobaliba sülen anidaksü aser tatem maka taküm alangzüktsü atema Kibuba den tesendaktep tajung ayutsü ayongzük. Nikongdang sentong nung City Church Kohima pastor, Rev. Kedo Peseyie-i "Pututem nungi putu; taküm alitsü tamang" onük jembia liasü.

Intl' Prayer Center Khutak, Longjang nung Revival sentong akatsü

Mokochung, Mongputeni/October 28 (TYO): International Prayer Center Khutak, Longjang (IPCKL) nung November 3 nungi November 5, 2023 tashi asentenshi sentong (revival) ka ayongzükoga akatsü, ta Honibarnü IPCKL Chairman aser Secretary nati külem sangdong ka ajanga metetdaksü.

ANOGO ABEN TSÜNGREM DEN

TIYAZÜ TESAYUR

Kechiyong tekülakoktsür jenti alima nung adokogo. Yisu Khrista shi nung aru, ajia parnoki menangzük. Aji tekülakoktsür aser Khrista anemer lir.

~II Yohan 1:7

Yaküm October ita social media nung asen lima nung atalokba ka indang yamai zülua angu, "Nisung pezü Bolero temesung nung mener, kibong shia nung fellowship agüja senzür...lanurtem nem counseling agüja, brainwash sütsüa senzür ta angazükogo. Parnoki Yisu Khrista tenung mamshir aser Temeshi Laishiba bener mesenzür saka Laptop bener senzür... Deobarnü dang 'temeshi amungnü' ta asüba ya tai, aser ter shilem magütsüyonga timtemer kar yarira teperi, ta jembir. Parnok branch kati ashir, asen tetsü tebou, Lijaba, süng, lung külemküjabaji tajungba aser temesung nisungi asen akhi külemküjaba tajung intokdaksür tiyazü Laishiba sayu..."

Iba ya züngshir aika aoksa tsübutep. Laishiba nung item ajak indang shia lir nung koda. Ano teimba adoktsü, saka asenokbo Yisu Khrista dak nungi kechi ochiba angazükoga lir aser ameta lir, iba nungi mainshitsü atema saksalema atadi. Shinga nema asen mekülakokdaksütsü tanela nung akangshia lidi.

SARASADEM:

Tematiba Tsüngrem, Lai nung shia aliba ochitem ni tali keta sena angazüktsü aser temesüzükba ajak koktetsüsa renemjangma. Amen

Texas nung aliba Arogo nung pastor, Dunagan amoi aoba mesak



Asenoki kechi ang asütsüar memetetba mapang nung Tsüngrem dangi meyiptsü aser sarasademtsü atema asenok dang sayur. Onoki Dunagan'er kibong, Arogo züngsemtem, staff tem ajak asoshi sarasademtsür," ta Executive Pastor Jay Lee-i sign süa aliba sangdong ajanga metetdaksü. Arogoi Brihostibar nikongdang 12:00 ako nungi aonung 7:00 ako tashi Tenla kidang Dunagan nüngtem nung sarasadem sentong ka ayongzükoga agiogo. Pastor-i pa kinüngtsü, Ali den chirnur asem toktsür pilar. Hokolbar anepdang-a pa nüngtem nung sarasadem sentong ka ayonga agiogo, ta Lee-isa metetdaksü. "Tanep onok melung raksabaji o agi rasa-a meshitetter. Nenoki anepaluba, Arogo mission nung lenisüba aser Bryan meimba atema nenok ajak dang pelar," ta Lee-i metetdaksü. "Dunagan ya sempet aketba lenir ka aser ajemalu lenir ka

liasü. Pa taküm aser ministry ajanga taküm piyong Khrista meimba senmang tajung toktsür. Taküm aika melenshidaksütsü aser Khrista sülen anidakdaksütsü atema pai tejangraba tulu nung inyak. Khrista osangtajung proktsü, nütsüngsütsü, sarasademtsü aser Arogo tasen tentetsütsü (Peak Street Church, Grace Church Lake Highlands aser Good Shepherd Oak Cliff Arogo) atema pai kanga nendaka inyak; aser ibaji ajanga tanübo nisung meyrjang aika taküm nung kongshioago aser maneni tarutsü nunga meyrjang aika kongshitsü," ta Arogoi metetdaksü. Tamalen Dunagan-i Atlanta nung aliba Peachtree Presbyterian Arogo nunga küm 9 teaching pastor inyaka liasü. Pa Stanford University nung bachelor's degree aser Regent College nung master of divinity degree anguba sülen Fuller Theological Seminary nung doctor of ministry degree angu.

October 28, 2023: Texas kübok Dallas nung aliba Highland Park Presbyterian Arogo ka nung Pastor, Bryan Dunagan amoi aoba mesak. Arrshi küm 44 pastor, Dunagan asüba sülen Arogoi mangyimdar. Pa arrshi küm 34 asüba mapang nungi pa iba Arogo nung senior pastor inyaka aruogo. Iba Arogo nung züngsem 5,500 dak tema lir. Pa Bodhbar aonung mejang aser Brihostibarnep (October 26) mesak, ta Arogoi Facebook post ka ajanga metetdaksü. "Iba osang ajanga onok aoksar. Iba ya takoksa tulu.

Chakhesang Baptist Church Kohima--i Gospel Teens Camp ayonga agi



Kohima, October 28 (TYO): Children Ministry, Chakhesang Baptist Church Kohima-i anogo pezünü 'Gospel Teens Camp' ka ayongzükoga kaogo.

"Manokshitaba" II Korinth 13:5-7 omen nung ajemdaker iba camp ya October 21 nungi October 24 tashi Nagaland Bharat Scouts & Guides Training Centre, Nerhema

nung ayongzükoga agiogo, ta Arogoi sangdong ka nung metetdaksü. Iba camp nung shilem agia adener nisung ajak senteper 121 liasü.

Tekülem sentong agiba dak alia kasa camp nung nüngdakba training balala agütsü; item rongnung first aid, lisü alenba yimya, noksa keta yanghu yangluba aser

kidang tagitarutsü balala yanglutsü sayua liasü. Iba dak alia awashi meteta internet/social media amshiyim tesayuba agütsüba sentong-a ka agi.

AO OSHI ANGAZÜKDAK:
TANÜ ANGAZÜKTSÜBA OJANG



Sashisashir

(adj) ain tulu adokba yimya (fierce)

* Ozü kidang azü sashisashir ka lir.

Sashia

(adv) tuluka (greatly)

* Chubabai benjong sashia ka ayongzük.

OLONG PAITEP # 6679

1		2		3		4		5
			6		7			
8								
					9			
		10						
11								12
				13		14		
15								
16						17		

TIPLÉN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6678 TELANGZÜBA

TIPLÉN :

- 1. Kilir, 5. Lasüng, 7. Samaru,
- 11. Jaka, 12. Naro, 15. Langzü,
- 17. Mapang, 18. Arong.

LANGTSÜNGLEN :

- 2. Lasa, 3. Kar, 4. Ana,
- 5. Langtsüng, 6. Sujong, 8. Rajem,
- 9. Arogo, 10. Tanela, 13. Züno,
- 14. Lao, 16. Ano.

KHEN SHISADANGDI

ALOKBAI AOR DEN TEMELENSHITSÜ KAR LEMSATEPER :

Hoi !Aortem! Ajaki meteta lir, saka meinyaker. Joko satiba mongpu tonga aruogo, oh.... Kiburi ah aowashi meteta külüzüng agizükba sentong temerbo chiyungdak mapang kangabo telalu nih..... Kiyimsang o kiyimla na ajurur aotsüburtem menden mali talanglang nokdaka alibajiah reprangangma. Tetezü, sentong kangabo benjapurua terenema. Nür satidak nung jagi ano tangaleni aotsü lir ta tamadok.

Satidaki arurtemi, nü auso nung na peri dang inokangma. mechima indokba teyimba angur, kibur noksenbaji toktsür, na awashi malibaji anasa alir jagi ngudar ta metetangma.

Joko tsüngküm arur, anü tatsü kümogo, Pastor-tema onük tajung akok tashi tatsütiba nung renemer santem nem anganüa agüjangma. Na talanglang jembia kazübaji tajangzük mali, tantsür tambur ariana sentepi arurtemji amang nung tetsüng agi aotsü tebilemtsü.

Aiben ashir, saka sentep nung nai mendanga yur, tangar na alema timtema toudaktsü. Ajak dang yimya tamajungbaji ibaji ta metetang. Sentepi arur na agi tai temenadaktsü.

Tanur tain ajaki iba yimya bentshitsu ni Alokbai ayimoktsür.

- E_mail

Manipur nung kozüjangshibelener nisung 24 apu

Imphal, October 28, 2023

(Agencies): Assam Rifles sepaitemi Manipur nung areca nuts (Supari) tonne 52.1 puogo.

Honibarnü sepaitemi Rs. 6.25 crore alang kozüjangji Shaktiman truck gari 12 nung bena lia apu. Iba dak sendakba nung nisung 24 pua lir.

Myanmar arrtsü anasaKamjong District kübok Phaikoh nung drivers/co-drivers 24 apu ta defense wing-i metetdaksü.

Osang tejangja ka angazükba sülen Assam Rifles sepaitemi truck garitemji arrtsü adener India tsütsü arudang apu.

Nisungtem aser parnok ket nung apuba kozüjang ajak Forest Department, Kamjong ket nung agütsüoggo ta defense wing-isa ashi.

MULUNGNEN O

Taküm nung asütsüba ya asenok mulungjang nung meteta aliba shilem ka dang lir. Atangji, asüba agi asenok taküm aliba tetezü tali jangjar kechiaser iba yagi asenok taküm ya sentia ta nenshia angatetdaksür.



21:06:1962 ~ 20:10:2023.

Ozü temeim **SENTI WALLING** (Süngratsü) mapang tatsüka shiranga alidang aser pa ajungbena iba lima nungi pilar onok mangyim jashi timtem nung alidang yariteperitem ajak dang onok kinungertemi kanga pelaba metetdaksür.

Talisa DABA, kiyongertem, tembar – medemertem, Fellowship aser lokti tentettem aser temeimertemi sarasadem, nübo aser rongsen agi onok dang meima yariba asoshi onoki kanga pelar. Tsüngremi nenok ajak talubosa moajangma ta onoki sarasademtsür.

- Temeim Kinungtsü & Kinungertem.

2024 LS election nung AIUDF-i menden 3 nung takok angutsü



AIUDF Chief Badruddin Ajmal

Guwahati, October 28, 2023

(Agencies): AIUDF chairman aser Dhubri MP Badruddin Ajmal-i Dhubri nung sentong ka nung jembidang Congress-i state pezü nung takok angutsü ta ashi.

Taruba assembly elections nung Congress-i takok angutsü saka Congress-i Assam nung nübo agi tangar memenepertem asoshi timtem bentsür aruogo ta Ajmal-i ashi.

"Congress party moatsür

asem INDIA pusema nungiter. 2024 nung Modi oadoktsü" ta paisa ashi.

"Prime Minister Modi-i Varanasi nung Ram Mandir nung sarasademtsüba dak alaka teinyaktsü kecha malitsü. Ano Allah-i dang Himanta Biswa Sharma kongi aotsü'ar meteta lir" ta Ajmal-isa shisem.

"2024 Lok Sabha elections nung AIUDF-i menden 3 nung takok angutsü. Onoki Dhubri, Nagaon aser Karimganj nung

takok angutsü. Dhubri nungbo kü den tetokteper melii takok angutsü saka Nagaon aser Karimganj nungbo Congress aser BJP den tokteptsü" ta pai metetdaksü.

"Dhubri nung Congress kanga tashimait kümogo. Mapang ka nung Congress-i Dhubri nung azü ka nem ticket agütsü nunga takok angutsü ta jembia liasü saka tangbo Dhubri nungi Congress King (Badshah) tamakok angutsü" ta Ajmal-isa ashi.

Congress sorkar mapang shisaliok wadang atema mapa kecha meinyak. Parnoki Dhubri nung university mesüra medical college kecha melapok. Parnok mapang school nung tesayur maliasü ta paisa ashi.

Mizoram nung kaketshirtemi ILP malir mita ao

Aizawl, October 28, 2023

(Agencies): Mizo Zirlai Pawl (Mizo Students Association)-i ozüng alema arua shishilembartem aser permit maliba mapa inyakerem mita ao.

Honibarnü parnoki Inner Line Permit malir mesüra expired documents abener nisung 78 apu. Parnok ajak bangdakpur ket

zungsemtemi yaritep. Kaketshirtemisa village aser local council councils dang ILP dak sendakba nung recognition letters magütsütsü atema mepishia metetdaksü.

Iba mapa nung MZP lennirtem, College Students Union (SU) lennirtem aser Hnampual Zirlai Pawl

MZP ketdangpurtem dang Inner Line Permit (ILP) bentshitsu aser ILP kümdanga agütsütsü mepishia metetdaksü.

MZP-isa kulikaket maliba shishilembar mesüra mapa inyakerem dak tenük yoka mittsü metetdaksü.



Asom Jatiyatabadi Yuba Chatra Parishad (AJYCP) züngsemtemi Gerukamukh nung Subansiri Lower Hydro Electrical Power (SLHEP) plant indang tzünokdang yangluba tesem nung lungkak aitba angur. Hokolbarnep nungi Subansiri ayong nung tzu akongba atema state sorkar aser sendaktepa alirtem nungi telangzüba kecha manguba ajanga AJYCP züngsemtemi tanü iba sentong ayonga agiogo. (North Lakhimpur, October 28)

Israel-i Hamas commander' ka tepsetogo



Israel aser Hamas na tsungda maneni raraba mapang ka nung Southern Gaza Strip kubok Khan Younis tesem nung Israel-i amakba tesem ka nung emergency personnel tem mapa inyakba noksa nung angur.

Jerusalem, Mongputeni/ October 28 (Agencies): Israel Defence Force (IDF)-i Honibarnü sangdong ka ajanga, parnoki Hamas commander ka tepsetba sangdongogo, shiba anir paraglider temi October 7 nü Israel maka liasü.

Kiralongrara commander ya Asem Abu Rakaba ta jangjaogo aser pa tetuyuba nung drone temi military indang post tem maka liasü, ta IDF-isa metetdaksü.

"Hokolbar aonung IDF fighter jet temi Hamas indang Aerial Array tekolakba Asem Abu Rakaba tepsetogo. Hamas pur UAV tem, drone tem, paraglider tem, aerial detection aser defense ya Abu Rakaba tazüokba kubok liasü," ta IDF-i X sabanga ajanga metetdaksü.

"October 7 nü Israel amaksü atema sentong yangluba nung pa densema liasü aser paraglider tem nung Israel-i aitba kiralongrartem ya pa tetuyuba nung inyaksangshi aser IDF post tem amaksü asoshia pai tetuyuba agüja liasü," ta IDF-isa shisem.

October 7 nü sülen IDF-i Hamas pur tongtibang lenirtem aika tepsetogo. October 7 nü Hamas pur Israel telungi aita tetsür aser tanur densema nisung 1400 tepset aser bendanger densema nisung 200 dak tema pur ao.

IDF-isa sangdong ka ajanga

October 14 nü iba telok indang taoba aerial forces tekolakba Murad Abu Murad tepsetba osang sangdonga liasü.

Hokolbar aonung aser Honibar anepdang Israel air force-i northern Gaza Strip nung Hamas puri ali telung nung yanglur aliba tesem 150 maka liasü.

"Iba tesem amakba mapang kiralongrar telok Hamas nungi kiralongrartem tepsetogo aser combat tunnel tem, underground combat space tem aser tanga ali telung nung yanglur aliba kiralongrartem indang infrastructure tem raksatüo," ta IDF-isa metetdaksüba den Hamas pur aika iba tesem amakba mapang tepsetogo, ta shisem.

Hokolbar aonung Yemen nung amendaker aliba Iran indang proxy terrorist organisation Houthis puri Israel dak missile ka khaloktsü saka Egypt kubok Taba tesem dak kongshia liasü.

Kasa mapang nung Hamas puri Honibarnü ashiba agi, Gaza nung kiralongrartem tashi ajunga agi Israel nung sepaitem den raratsü atema renemdar. Israel-i asendenshir gaza kanga sashia amakba mapang Hamas-i ashiba agi, parnok sepaitem arrtsü nung Israel nung sepaitem den radar.

Israel-i Gaza nung bomb

pokloktsüba ajanga internet aser phone service daka kongshio.

Israel military-i Hokolbar aonung ashiba agi, parnok indang ground forces-i aonung inyakyim tali atsülangshio.

Hamas-i ashiba agi, Israel Ato Kilonser Benjamin Netanyahu aser pai aniba sepaitemi takok mongutettsü.

October 7 nü nungi Israel-i Gaza nung bomb pokloktsü tenzüka sülen Palestine nung 7000 dak tema tepsetogo.

Hokolbarnüsa, humanitarian truce ka asoshi bangzüng ka benokba UN General Assembly-i agizükogo. Vote agitepba mapang züngsem 121-i iba bangzüng pusema vote agütsü, züngsem 44-i vote magütsü aser züngsem 14-i bangzüng anema vote agüja liasü.

Maneni Israel military-i Honibarnü ashiba agi, parnoki Lebanon nungi parnok indang drone ka dak surface-to-air missile ka khaloktsüba nokdangogo aser iba missile khaketa yokba tesem amak tenzüokgo.

"Lebanon nungi IDF UAV (unmanned aerial vehicle) ka dak surface-to-air missile kahaloktsüba IDF (Israel Defense Forces)-i nokdangogo. Iba missile khaloktsüba atema telangzüba agüja IDF-i iba missile khaketa yokba tesem amak tenzüokgo," ta IDF-i ashi.

MENUNGRA BILEMTETER



Lt. Bendangakum Longkumer

Tasüba: 29.10.2022

Onoki kodanga amatsü makokba jabaso aser tebu ka, na mali tanü tashi onok mulungjang nung anisungzük maka, ne temeim, aria bilemba shisatsü aser ne mapa tajungtem teti bilemteter. Saka Kibubai agütsü aser Paisa bener aonung Kibubar anogo nung asenok ajak ajuruteptsü tang yongya atar.

- Temeim Ojala, Jalatem aser Kinungertem

PELABA LEMSATEPER



Aso: 05.10.1947

Asü: 06:10:2023

Onok mangyim tia nung alidang Kija, Kibong, Arogo, Lokti (Union) aser temeimertem shirnokisa nübu, rongsen aser sarasadem agi nungita yariogo nenok ajak dang asür Tamsümangyang Aier (Longpa) kinungertem ajaki mamatoktetba tepela lemsateper.

Ano mejeta item dangi pelar:

- | | | |
|-------------------------------------------------|---------------------------------------------|------------|
| 1. Mr & Mrs T.R Zeliang | 7. Dimapur | Longpa |
| 2. Chümoukedima Ao Baptist Arogo | Medemsanger | Telongjem |
| 3. Chümoukedima Ao Baptist Arogo Women Ministry | 8. Dimapur | Longpa |
| 4. Chümoukedima Ao Senso Telongjem | Telongjem | Senso |
| 5. Chümoukedima Evangelist Prayer Group | 9. Dimapur | Longpatsür |
| 6. Dimapur Longpa Fellowship | Telongjem | |
| | 10. Kerela Baptist Bible College (Kottayam) | |
| | 11. Kohima Longpa Senso Telongjem | |
| | 12. Wated Telok | |

Nenok kija dangi arua pelar ta meshitetba asoshi nemjemer. Saka iba ajanga nenok ajak dangi pelar aser tenüngsang agütsür.

-Temeim Kinungtsü, Chirnurtem aser Kinungertem.

Kazakhstan nung nagmati atudak ka nung mi adok: Nisung 28 asü

Astana, Mongputeni/ October 27 (Agencies): Kazakhstan nung Arcelor Mittal Temirtau indang nagmati atudak ka nung mi adoka iba tesem nung mapa inyaker 28 süogo, ta Ministry for Emergency Situations-i metetdaksü.

Methane apok asütsü ta bilemba sülen Kostenko mine nung mapa inyaka alir nisung 252 nungi 206 aninogo aser nisung 18 tashi temang anepalutsüsa aküm, ta company-i Honibarnü sangdong ka ajanga metetdaksü. Honibarnü 2 ako tashi nung ano nisung 21 monguteti liasü.

Arcelor Mittal Temirtau ya Luxembourg nung amendaker aliba multinational Arcelor Mittal indang local representative lir. Arcelor Mittal ya alima nung steel producer tulutiba rongnung tanabuba lir. Parnoki Karaganda tesem nung nagmati atudak ti tashi achaayanger aser iba den central aser northern Kazakhstan nung iron ore mine pezü tashi achaayanger.

Arcelor Mittal Temirtau-i achaayangba mapa inyakba tesem nung aiben lendong ataloka arudar aser Honibarnü mi adokba ya tatalokbatem rongnung tesüsabuba asütsü. August ita kasa mine nung mi adokba sülen mine nung mapa inyaker pezü asü aser 2022 küma November ita methane leak asüba sülen nisung pongu

süa liasü.

Kazakh tir Kassym-Jomart Tokayev-i Honibarnü ashiba agi, pai aniba sorkari Arcelormittal den investment partnership tembangtsütsü. Paisa, asür kinungertem den asükhü lemsatep aser October 29 nü ya mangyimba anogo ka asütsü ta sangdonga liasü.

Sorkar sangdong ka ajanga ashiba agi, sorkari company nationalise asütsü atema tenangzüktepba ka yangluba tatembang ka dangi arudar. Iba osang ya ArcelorMittal-ia jangjashitsüo.

"Tanü Kazakhstan sorkari sangdongba osang Arcelor Mittal-ia jangjashitsür. Telok ana ya Arcelor Mittal Temirtau tarutsü dak sendakba nung sensaksema aruogo aser Republic of Kazakhstan nem ketdangsuba bendanga agütsütsü asoshi tawa tenangzüktepba ka nung sign süogo," ta company-i ashi.

Taoba ita mezüngbuba Deputy Prime Minister Roman Sklyar-i osangbenertem dang, iba mill achaayangtsü atema investor tem den sensaksemdar ta ashi.

Paisa, Arcelor Mittal-i hadirtem upgrade masüba aser lendong aika atalokba sülena mapa inyaker tem tekümzüka kubok toktsütsü atema jenjang tapet magiba agi cabinet mepelar, ta ashi.



Lewiston, Oct 28: Lewiston, Maine nung lokti dak injang khaloktsüba dak sendakba nung temulung melemba bilemsang Robert Card Hokolbar aonung sür lia ngutetogo, ta Androscoggin County Sheriff indang Office-i Facebook nung sangdongogo, ta CNN sangdong ka ajanga metetdaksü. Pai nisung 18 khasetba den 13 tashi yirutsüba sülen ghonda 48 lir pa tasü mang ngutetogo.

Moanungsang MSC aser Telongjem FC MDFA Trophy Semi Final nung asayatsü maongka ngutetogo

Mokokchung, Mongputeni/October 28(TYO): Mokokchung District Football Association-iyongzükba MDFA Trophy tanu mezüngbuba aser tanabuba Quarter Final asayaogo.

Tanü mezüngbuba Quarter Final Moanungsang MSC aser NU Lumami tsüingda asayaba mapang nung asaya tenzüker minute 15

buba nung NU Lumami telok nung jersey no 11 Neilei Nagi-i goal ka yok saka minute 19 buba nung Moanungsang MSC telok nungi jersey no 5 Inovi Chishi-i goal ka yokteta tena kasasa aküm, asayayonga aoba mapang nung minute 42 buba nung Moanungsang MSC telok nungi jersey no 10 Meyasenba-i goal ka

metsüokja par telok takoklen kümer anisüngzükba mapang agia liasü.

Tanabuba Quarter Final Telongjem FC aser Brotherhood FC tena tsüingda asayaba nung Telongjem FC telok nung jersey no 15 H.Robinson Khongsai-i minute 10 buba aser minute 24 buba nung goal ana yok ano jersey no 7 Nyihtong Magh-i minute 18,

minute 21 aser minute 45 buba nung goal asem yokteta pai iba asaya nung Hattrick ajangzükttet aser tatemsa jersey no 11 Shurusul Zhotso-i minute 82 buba nung goal ka yoka item goal trok jagi Telongjem FC teloki goal 6-0 agi Brotherhood telok ajemshia koker MDFA Trophy 2023 semi final asayatsü maongka

ajangzükttetogo.

Iba asaya nung Brotherhood telok nungi jersey no 10 Asish aser par telok nungisa Merennok tena yellow card agi merenshia liasü.

30-10-2023 nü Quarter Final Fixture
11:00 Am

KSUM Vs Super Seniors SS
2: 00 Pm

KSR Team Vs SSS



Mitti Ko Naman Veeron Ko Vandan

MERI MAATI MERA DESH

Amrit Kalash Yatra and Amrit Mahotsav shibangba sentong

**30th & 31st October, 2023
Kartavyapath, India Gate, Delhi**



“ Meri Maati Mera Desh sentong yagi asenok telongjem aser tangatetba tashi itdaktsütsü. Iba sentong kübok linük ajaklen nungi bendenba ali agi Amrit Vatika yanglutsü, iba jagi Ek Bharat Shrestha Bharat mangdang ataloktsü ta ni amanger.”

Narendra Modi
Prime Minister



Meri Maati Mera Desh ya nübortem mapa kümogo Linük ajungalen sentong lakh 2 dak tali ayongzükogo

- Selfies crore 4 dak tali yuva.gov.in nung enoktsüogo
- Blocks 7,000 dak tali nungi shilem agir
- Shilaphalakam 2,33,000 mesuogo
- Süngdong crore 23 lakh 60 temogo
- Amrit Vatikas Lakh 2 meyirijang 63 yangluogo
- Amrit Vatika ya Kartavyapath nung linük ajaklen nungi Amrit Kalash 8500 nungi ali bener aruba agi yanglutsü.

Lapokba Sentong Mera Yuva Bharat (MY Bharat)

31st October 2023 | 4:00 pm | Kartavyapath, India Gate, Delhi
Mera Yuva Bharat ya autonomous body ka lir, iba yagi lanurtem renloktsü atema technology amshia inyakba maparentem nung yaritsü.
'Mera Yuva Bharat' ya autonomous lir.

Chief Guest

Narendra Modi

Prime Minister

Event highlights

**Amrit Mahotsav Memorial creation on Kartavyapath | Creation of Amrit Vatika
Light & Sound Show | Cultural Extravaganza | Amrit Awards Ceremony**

All are invited!

© Watch the live telecast on DD News